



He Muka

He Pitopito Kōrero nā Te Taura Whiri i te Reo Māori

Kia titiro whakamuri tātou i te wehenga atu o te Ahorangi i Te Taura Whiri

Nā Lana Simmons-Donaldson te ringatuhi. Nā Priipi Walker i whakamāori.



Ko Patu Hōhepa

Kua whakapuakina te ingoa o te Ahorangi hōu o Te Taura Whiri i te Reo Māori, a Erima Henare, nā reira e tika ana kia whakarārangitia ētahi o ngā mahi nunui i oti i raro i te mana o tō mua Ahorangi, o Tākuta Patu Hōhepa.

Kua puta tēnei kōrero i a Haami Piripi, kaiwhakahaere matua o Te Taura Whiri. “Nā ngā pūmanawa o Tākuta Hōhepa i te taha wetereo, i te taha rangahau, i te taha tōrangapū, i ngā hononga ki te ao Māori me te ao kaupakihi, i pakari kē atu ai te kaha o Te Taura Whiri i tāna noho i reira mō te whitu tau,” e ai ki a Haami.

“He mea waimarie, i te mea nāna mātou i kaha ai ki te tūhonohono ki ngā hāpori Māori, me ngā hāpori reo o ngā moutere, me ētahi o ngā tino rōpū o te motu, pēnei i Te Whakaruruhau

o ngā Reo Irirangi Māori, i Whakaata Māori, i Te Reo Tātaki o Aotearoa, i Microsoft me Te Kāhui Tika Tangata i roto i ā mātou mahi. He maha tonu ngā tino kaupapa hōu nā Tākuta Hōhepa i whakatū; ko Te Mātāpuna tērā - te papakupu reo Māori anake, ko Mā Te Reo tērā - te pūtea āwhina i te reo i waenga i te iwi, ko Matariki tērā - te tau hōu Māori, ko Kōrero Māori tērā, he kaupapa pārongo mō te reo, me ‘Into te Reo, ‘Give it a go,’ he kaupapa akiaki i ngā tāngata katoa, ahakoa ko wai, kia huri mai ki te ako, ki te kōrero i te reo,” e ai ki a Haami.

He poutokomanawa a Tākuta Hōhepa i roto i ngā mahi whakahōu i Te Wiki o Te Reo Māori, me te whakatū hōnore mō te mahi auaha ki te whakamahi i te reo puta noa i te motu.

Ka wehe atu a Tākuta Hōhepa i ōna hoa o te poari me te kōingo o te ngākau, i a Iritana Tāwhiwhirangi rātou ko Hana O’Regan; ko Ruakere Hond, ko Wayne Ngata. Kua whakahōutia te noho o ēnei tāngata mō tētahi toru tau atu anō.

“Kanohotepoari, ngā kaiwhakahaere me ngā kaimahi i roto i te pouri, otirā ōna mōhiotanga nui ki te reo me ngā tikanga Māori, me tōna kaha ki te pupuri i te hoe urungi o te waka ahakoa pēhea te hūkeri mai o ngā ngaru.”

“I a ia ka tae nei ki te mutunga o tōna nohonga tuarua hei tumuaki, ka wātea anō a Patu ki te mahi i waenganui i i tōna whānau, i tōna hapū me tōna iwi - e kore e mutu ngā mihi ki a ia, me te hiahia kia hora te marino ki mua i a ia” te ki a Haami.

Kei Roto

Kia titiro whakamuri tātou i te wehenga atu o te Ahorangi i Te Taura Whiri 1

Te Kunenga ki Pūrehuroa 2

Te Rua Ngāhurutanga o Te Tumu Herenga Waka 3

E ai ki te Kōrero 4

Tirohia Kimihia 4

He Hui Kirihimete Kāmeheameha 5

Whakataukī

“Tēnā takahi iho, kei whea he tūranga?” 5

Maramataka 6

Te Kunenga ki Pūrehuroa

Nā Tairahia Black, nō Ngāi Tūhoe

**Te Mata o te Tau
Tō Tātau Reo Rangatira
22-24 Whiringa-ā-rangi 2006**

He taonga te reo Māori, he mea whakapūmau ki te iwi Māori i raro i te Tiriti o Waitangi ā, mā te iwi Māori anō hei arataki ngā mahi whakaora i te reo Māori. I roto i ngā tau maha nei huhua ngā momo hapori Māori, kokona hinengaro Māori i kakama, ahakoa ko wai huri i te motu i whakatinana i aua kupu whakaora, whakahirearea i te reo Māori. Kia kōrerotia te reo ki tēnā whakatipuranga, ki tēnā whakatipuranga.

Whāia, i roto i ēnei tau mutunga kore nei ka hākiri tahi mai ngā whakataunga kaupapa e mau ana ki te ngutu, ki te ārero Māori me te Pākehā. Inārā ēnei kaupapa Te Tiriti o Waitangi, mātauranga, mātauranga taketake, hangarau, hauora, pūtaiao, whenua, tā te Māori momo rangahau, taonga tuku iho, torangapū tūhono, whakaora whānau, te taha ture tangata, ture ā-motu, reo irirangi, pouaka whakaata, āra atu, āra atu.

Ka whai take Te Mata o te Tau o Te Kunenga ki Pūrehuroa ki te whakatū hui, engari ko tēnei momo hui kia kōrerotia aua kaupapa hākiri ki roto i te reo Māori anake. He tuatahi tēnei kia mātaamua te ahi kōpae, kia kai māhurehuretia ēnei kaupapa e manakotia ana, e ānewa ai te Māori ki roto i ‘tō tātau reo rangatira’. Papā ana, oioi ana ngā kupu, ngā whakaaro kia titiro tata, kia titiro tawhiti.

Tioriori, ngāoko ana ngā kaupapa i ngā matua kaikōrero me ngā ātamira kōrero, me te hunga kaiwhakarongo. He wawata tērā kia

whakawhāiti aua kaupapa hākiri, kia ūia ki roto i tō tātau reo rangatira. Waihoki tātau ka mōhio ka pēnei rawa te reka, kia hotahota, kia whakaaratia ēnei kaupapa hei taukaikai mā te hui e tau ai ngā whakaaro, tikanga, hiahia, tūmanako, hītorā, mamae, pouiri, titiro whakamua, whakamuri.

I matawaia te tatau o te whare kōrero e Ahorangi Tāmāti Reedy ki ētahi kupu whakamaumahara ki a Te Arikinui Te Ātairangikaahu. Whai muri i a Tāmāti ko ngā matua kaikōrero, ātamira kōrero, me te hunga i whai whakaaro ki ngā kaupapa. Ka kitea, ka rangona te tohungatanga o tā rātau katoa whakaora, whakatakoto whakaaro. Kāre rawa i whakapōreareatia, i whakararua mai te hinengaro, te ārero Māori kia tipu, kia putuputu te rere o te kōrero. Pērā anō hoki te taha ki te manuhiri tūārangi i haere mai i Airana a Dr Muris O’ Laoire. I whakatakototia tana kauhau ki roto i tana reo matua o Gaelic, me tana hiahia kia kaua ia e kōrero Pākehā, he mea whakamāori tana kauhau ki te hunga whakarongo. Papa horo ana te whare ki te whakarongo ki tana reo matua o Gaelic. Kua takoto te huarahi kia kokoria ēnei momo hui, hei paiaka ātamira hōu kia āhei ai ngāi tātau ki te kōrero i ngā kaupapa e manakotia ana e tātau ahakoa he aha te kaupapa. He ātamira hōu tēnei mā tātau hei whakatipu, hei tiro noa atu rā ki te ao tawhiti, kia kūmea mai kia tata!



Ko Tairahia Black rātau ko Dr. Muiris O’ Laoire ko Wayne Ngata.



Ko Joe Williams rātau ko Dr Tamati Reedy.

Te Rua Ngāhurutanga o Te Tumu Herenga Waka

Nā Kiwa Hammond, nō Ngāti Kahangungu ki te Wairoa

*Ko hea te maunga e tū mai nei?
Ko Ahumairangi! Ko Ahumairangi!
E, nukunuku mai! Nekeneke mai!
Nukunuku mai! Nekeneke mai!
Ki taku tauaro e kīkini nei!
Ue hā! Ue hā!*

Nō te ata pō o te 6 o Tihema 1986, i uia te urupounamu 'Ko wai te whare nei?'

Nā te ruānuku o te maunga titohea, nā Huirangi Waikerepuru te pātai i whiu - i a rāua ko Matiu Māreikura - tohunga o te awa tupua - e taki ana i ngā karakia hei whakatuwhera i te wharenuī hōu i Te Whare Wānanga o Wikitōria.

I meatia e te Ahorangi o te tari Māori o te whare wānanga i taua wā, e Hirini Moko Mead, 'Ko Te Tumu Herenga Waka!'

I tana whakahua ake i te ingoa kia rongona e te ao, he tohu tērā kua

tinana te momoēa o te hunga nō rātou te whakaaro ikeike kia hangā tētahi whare whakairo pērā hei rāhiri mai i te ngahue tangata ki te ao mātauranga, anō nei, ko te whetū o Poutū-terangi kei ngā huihuinga o Matariki e hinātore mai ana, e piātaata mai ana.

I uia te pakirehua tuarua a ngā tōhunga 'Mō wai te whare nei?'

'Mō ngā tauira!' te urupare i puta mai. Tika tonu tēnei kī, nā te mea, ko ngā ringaringa toi - tōhau nui hoki, ko ngā rae werawera, ko ngā tuarā wahawaha nō ngā ākongā, ngā pouako me ngā kaimahi o te whare wānanga whānuī. Te mutunga iho ka tū te wharenuī o Te Tumu Herenga Waka hei tauranga mō ngā iwi.

E rua tekau tau whai muri mai, me kī, nō te 6 o Tihema 2006 i ikapahi anō ngā iwi - Māori mai, Tauīwi mai hoki - ki taua tauranga ki te whakanui i te rua ngāhurutanga o Te Tumu Herenga

Waka.

Tuatahi, he hokinga maumahara tēnei taiopenga ki te hunga i riro atu ki te pō i mua i te whakatuwheratanga pērā i te korokoro tūi o te reo irirangi - ko Wiremu Parker nō Te Tai Rāwhiti - whakawhiti atu ki te tohunga rongonui o Te Tai Hauāuru, arā, ko Ruka Te Rangiahuta Broughton. I huaraina tētahi pou haki hōu - ko Te Pou Kairangi tōna ingoa - hei maumaharatanga ki a rāua.

Tāpiri atu ki ngā mate whai pānga i hinga atu, i hinga mai i roto i ngā tau pērā i a Maka Jones rātou ko Monita Delamere, ko Lawrence Tukaki, ko Amiria Simpson mā - tae noa mai ki Te Arikini, Te Atairangikaahu. He hokinga maumahara, he hekenga roimata, he tukunga mihi me te whakaaro 'Mei kore koutou ka whakatakoto huarahi mā mātou hei whaingā, hei whiwhi painga mō te



Ko Te Tumu Herenga Waka.

takitahi, mō te takitini’.

Tuarua, ko te kaupapa o tēnei huihuinga he whakamihi i te piringa whare – pātaka kōrero – iringa o te kupu – kua toka tū hei tāwharau i te hunga tauira – taiohi nei, pakeke nei hoki – e whai ana i te tukutuku o Poutama ki te mātauranga mutunga kore kia noho tangata whenua ai te mātauranga i roto i a rātou.

I reira te momo o te tangata i whai

huruuru i tēnei kōhanga kia puta atu ki te ao kikokiko kake ai ki ngā puhitaioreore, ki ngā karamatamata o ngā kaupapa ka whāia kia eke pānuku, kia eke Tangaroa.

I whakanuia hoki ētahi kairangi o te ao Māori i whakapau kaha mō tēnei marae pērā i a Con Te Rata Jones mō āna mahi tukutuku; ko Pou Temara, mō te tiaki tikanga – kawa

hoki; ko Takirirangi Smith, mō te mahi whakairo; ko Ahorangi Hirini Moko Mead, mō te hāpai i te ako o te mātauranga i waenga i a ngai tāua te iwi Māori.

Nō reira, e te pou whare, tū mai rā, tū mai rā hei pou toko mātauranga, hei pou herenga kōrero, hei pou tūwatawata, e Te Tumu Herenga Waka e! E tū! E tū! E tū!

Te haka pōwhiri.



Ko Kiwa Hammond e tuku mihi ana ki a Te Tumu Herenga Waka.



Ko Piri Sciascia e whāikōrero ana.



Ko te tohunga whāikōrero, a Pou Temara.



I katakata te hunga whakarongo i ngā kōrero whakangahau a Julian Wilcox.



Ko Dennis Simpson e mihi ana ki ngā manuhiri.



Ko Pakake Winiata.





I huraina te pouhaki hōu i te rā
6 o Hakihea 2006.



Ko te tohunga raranga tukutuku a Con
Te Rata Jones.



I hongī ana a Piri Sciascia rāua ko
Pou Temara.



Ko Takirangi Smith te tohunga
whakairo o Te Tumu Herenga Waka.



Ko te Ahorangi Hirini Moko Mead
rāua ko Te Ripowai Higgins.



E ai ki te Kōrero



A nei he kōrero mataki te nāku mō te huarahi whakamua mō to tātou reo rangatira.

Tuatahi, mā te kāinga kē tō tātou reo i whai mana. Ki te kore te reo ki te kāinga kua kore katoa te mana o te reo ki te whakahaere take Māori. Ki a au ko te pūtake tuatahi tēnā o ngā Kōhanga Reo, ngā kura rānei ki te tautoko i ngā kāinga Māori me te tamaiti kōrero Māori. Mā te kāinga anō te mahi kia pakari ake tōna reo me te mita.

Kua tohua kē ko te Rautaki Reo Māori kei ia tari tōna ake mahi āwhina. Ngā mahi i oti i te Tāhuhu i te Mātauranga he nui rawa atu engari ka kite tonu atu kua mimiti haere te kaha o tātou kura motuhake reo Māori. Koia nei te āwangawanga tuarua me te pātai hoki nā te aha i pēnei ai?

Ko te āhua nei kei te piri pono ā tātou rangatahi ki te reo Pākehā hei reo kōrero. Tāku i titiro atu ka puta mai te tamaiti i te Kura Kaupapa

Māori. Ka whai tonu iho atu i te reo Pākehā. Kua roa taku kitenga atu i tēnei tūāhuatanga.

He mate kē tēnei e ngau ana i te kaha o te reo. Ka mutu kua ngoikore haere te tū o tō tātou reo hei reo mana motuhake. Engari kei tāwahi kē i rongo ki ngā tohunga reo o te ao mō ētahi take e pā ana ki ngā reo o tēnā iwi tēnā. Ko te kōrero i puta i te tohunga Pākehā ko pēnei:

Kua mutu rawa te wā ka noho ake te reo hei reo whakamārama ki te ao. I te mea e kore e taea e te reo kotahi te whakamārama ngā pito pito katoa o te whenua, mā te ipurangi hoki ka hono tonu ki te tokomaha.

Ka mutu kua riro ko te iwi Pākehā e whai atu ana i te reo Haiamama ā, ko ngā Hainamana hoki e whai atu ana i te reo Ingarihi. Nā te aha i pērā ai? Nā te mōhio rātou e kore e taea te mahi tahi inā e kore e marama ki ngā reo e rua. Kua mōhio tonu rātou e kore hoki e taea te katoa te ako, e kore e taea te rapu hōhonu, engari ka taea te whakamahi ipurangi, he kowae anō tōna, he reo anō tōna. Kua oti rawa i ētahi o ngā reo nunui o te ao te rorohiko kia hurihia te reo o tēnā

o tēnā. Kua tūtuki kē ngā mihini nei te hurihia ngā reo ki te 98 ōrau e tika ana i te wā poto. Ka mutu kua riro ko ngā mihini kē ngā kaiwhakamārama, mōmōu taima te whakaako hōhonu i reo.

Nā reira ka anga mai taku titiro ki ō tātou kura kaupapa kua tū motuhake ai i te ao Pākehā. He aha hoki ngā hua e puta tonu mai.

Kei hea hoki ngā huarahi mahi mō te tangata kaha ki te kōrero Māori? Ka taea pea mēnā ka whakapākehātia, te Paniora, te Hapanihi, te Iniana rānei. Kua pohēhē ētahi pea kua toa ake te reo Ingarihi i te reo Māori.

Te āhua nei e whakapono tonu ana tātou kia motuhake te reo o te tamaiti kia noho rangirua ōna whakaaro. Nā ko reira tonu te reo Pākehā e toa ana i te mea he maha ake ngā mea papai ki te ao Pākehā i tō te ao Māori nei. Ko te mea tika pea te mahi ngātahi ngā reo e rua, e toru rānei. Heoi anō he kōrero tēnei ki te whakaōnga ētahi atu whakaaro ki te kimi tonu he māramatanga kia ora ake ai o tātou kura, o tātou pā reo Māori kia riro kotahi anō te whare Māori, kia maha tonu ngā kōrero.

Tirohia Kimihia



Ko Tirohia Kimihia te papakupu tuatahi kua tuhia ki te reo Māori anake mā ngā tamariki, otirā, mā te hunga e ako haere ana i te reo Māori hei reo tuarua. Neke atu i te rima tau te roa o tōna whakawhanaketanga, ā, ko te pūtaketanga o ngā kupu tētahi kohingakupu mai i ngā tuhinga Māori i whakaputaina e Te Tāhuhu o te Mātauranga. Neke atu i te 750,000 ngā kupu kua oti te whakauru ki te pātengi raraunga. Nā tēnei kohingakupu i kitea ai ngā kupu waiwai o te reo, arā, ngā kupu e kaha ana te whakamahia i roto i ngā pukapuka mā ngā tamariki.

Āhua 3500 ngā kupu matua o tēnei papakupu, ā, neke atu i te 6500 ngā whakamārama. Kua tuhia aua whakamārama ki ngā kupu waiwai anō, nā reira ka ngāwari ake te whai mā te ākonga, tamariki mai, pakeke mai rānei. Kua takoto mai ngā

whakamārama ki ngā horopaki e mōhiohia whānuitia ana, hei huarahi anō mā te kaupānui ki te ao Māori.

Nō te marama o Poutā-te-rangi o tēnei tau, i whakarewatia ai a Tirohia, Kimihia e te Minita mō ngā Take Māori, e Parekura Horomia, kātahi ka tuaringia ki ngā kura kaupapa Māori me ērā atu whakaakoranga reo Māori kei ngā kura tuatahi huri noa i te motu. I nāianei kua wātea mai hei taonga hoko mā te tangata, ahakoa ko wai, ahakoa kei hea.

Ki te hiahia koe ki te hoko mai i tētahi māu, me toro i te paetukutuku www.huia.co.nz, me whakapā atu rānei ki te whare o Huia i Te Whanganui-a-Tara.



He Hui Kirihimete Kāmeheameha

Nā Mātai Smith, nō Rongowhakaata, Ngāi Tāmanuhiri me Ngāti Kahungunu ki te Wairoa

Nā Pūkana anō te reo karanga i tuku kia whakawhāiti ai te hākerere nō ngā kura kaupapa Māori o Te Ika a Māui ki te papa o Tāhaki i Tāmaki Makaurau, kia whakanekenekehia, kia whakanukunukuhia ō rātou kare ā-roto mā te waiata, mā te kanikani ā, mā te whakangahau hoki!

Neke atu i te rua mano tāngata i whakarauika atu ki te taunaki i te kaupapa kirihimete nei a Pūkana, kua eke nei ki tōna tau tuawhā.

I ahu mai ngā kura i Rotorua, i Rotoiti, whakawhiti atu ki Kirikiriroa, Ngaruawāhia me Whāngarei engari ko te nuinga nō te taone nui o Tāmaki Makaurau, Tāmaki Herenga Waka!

Ahakoā ngā āmaimai o ētahi (ko au hoki tētahi!) mō te āhua o te huarere,

(nā te mea i taua wiki rā i ūhia katoatia a Tāmaki e ngā pōkeao) engari māringanui i mua tonu i te whakarewatanga o te hui i puta mai ai te ihu o Tamanui ā, ka whitikina ngā tamariki e ngā hihi o te rā. Kātahi ka matakui kua rawa atu ahau me te ohu

mahi o Pūkana, kua mutu te mōniana o te ngākau ā, kua tukuna te kaupapa kia rere, kua kore hoki te manu nei e māku ai!

Ko te kaupapa matua i whakaritea e mātou i tēnei tau, ko 'Pasifika'.

Nā whai anō i mau 'lei' ngā tamariki hei whakarākei mō rātou i taua rā ā, ia au e tū anaki te papa whakangahau, ka titiro whakawaho ahau, te kaha hoki o ngā tae me ngā kano e piataata mai ana!

He pērā tōna hanga ki te uenuku, aē pono mārika, ānō nei he āniwaniwa te whakaminenga!

Nā wai rā, nā wai rā, ka tīmata te kaupapa.

Ko ngā kaiwhakangahau i tautoko i te reo karanga o Pūkana i tēnei tau, ko Jamoa Jam, tētahi o ngā pēne rongonui o Tāmaki Makaurau, ko Theo Va'a nō Ngāti Kahungunu; ahakoā tekau mā toru te pakeke o te tamaiti nei, kei taumata kē atu te kounga o tōna reo! Kei whea mai!

Ko Mabel Wharekawa Burt (Aunty Mabel) nō te hōtaka rongonui o

Whakaata Māori, "Pātaihia ō koutou Kōkā" i tū ki te whakakorikori i te minenga mā tana waiata Kuki Airini e kiia nei, ko "Hoe waka".

Mea rawa ake kua tū hoki a Hana Koko ki tōna taha, kopikopi ai!

Tau kē tēnei āhuatanga ki ngā tamariki, hurō ana katoa rātou!

Kāre e roa kua tū hoki ētahi o ana irāmutu nō Te Kura Kaupapa Māori o Otepou ki te tautoko i tō rātou whaea!

I haere mai hoki Te Wharekura o Rākaumangamanga, ka waiatahia e rātou ngā waiata e rua. He waiata Kirihimete te mea tuatahi, he waiata whakamaumahara ki Te Arikini Te Ataarangī Kaahu te waiata tuarua.

Kotokoto tonu ana a waikamo i te aroha komaingo mō tō tātou kura i hinga atu i tēnei tau, ngā mihi ki te wharekura i haere mai hei kanohi mōna, mō tōna iwi o Waikato, oti rā mō te Kingi hōu, mō Tūheitia me te Kāhui Ariki nui tonu, pai mārire ki a koutou.

Nō tata ake nei kua auraki mai ai tētahi korokoro tūi nō Te Arawa waka a



Ko te tīma Pūkana e waiata ana.

Tūranga Merito ki tōna ūkaipō. I ngā tau e toru kua pahemo ake nei, kua rere te manu tioriori nei ki Poihākēna, ki Poipiripiri, ki Haina hoki, ki reira waiata ai. I riro i a ia te turanga o 'Simba' i roto i te whakaari o "Lion King".

Nō mātou te whiwhi i whakaae mai ia ki tā mātou i inoi atu ai, ka tū ia ki te waiata, wehe ana te whakaminenga i te rekareka!

Ko 'Dziah' tētahi rōpū kanikani karetao e mōhio whānuitia ana mō tō rātou whakapeto ngoi, kia eke rātou ki te tāpuhipuhitanga o tēnei momo kanikani, nā konā ka tukuna te reo karanga ki a rātou kia haere mai ki tēnei kaupapa kanikani ai, me kōpēnei au, "kei runga noa atu tā rātou haere mai!"

I hoki mai te Minita Māori mō ngā take Māori a Parekura Horomia i tēnei tau ki te tohatoha me te tītari atu i ētahi taonga ki ngā tamariki, koinei te tau tuatoru kua haere mai ia ki te taunaki i te kaupapa.

Kāore i ārikarika ngā mihi ki a koe e te Matua mō tō kaha tautoko i a mātou ia tau, ia tau!

Heoi, ka mutu te hui, kua hikina ngā pāhi, ngā paraikete, kua haere ki ngā pahi, kua hoki horokukū ngā tamariki ki te wā kāinga.

Ngā mihi nui whakaharahara ki te hunga tamariki i haere mai ai i tēnei tau, hei whakaminenga mō te kaupapa Kirihimete kāmehameha nei a Pūkana.

Mei kore ake koutou, kua kore hoki tēnei kaupapa!

Meri Kirihimete ki a tātou katoa, hei te tau tūtoki, kia koroi!



WHAKATAUAKI

Nā Hohepa MacDougall, nō Ngāi Tūhoe

"Tēnā takahi iho, kei whea he tūranga?"

I ahu mai tēnei pepeha i ngā kōrero a ngā tīpuna i tukua ki a Hori Kerei. I puta tēnei kōrero i mua tata i ngā rā o te tau 1857. Ka kite tātou i tā rātou

mārama ki ngā mahi a te Pākehā i taua wā, e hiakai whenua ana rātou mō te maha me te tini o ngā tāngata kainoho whenua e whai mai ana i a ratou. Ka puta te pouri mō te āhua o te ngaro haere o te whenua a ngā whānau, hapū, iwi hoki. Kua mōhio kē ō tātou tīpuna ka ahatia te Māori i ngā rā e tū mai ana, arā, ka kore haere he tūrangawaewae a tēnā, a tēnā. Kua tīmata noa atu te eke o te kupu o runga nei, ko te mutunga mai, kua kore te nuinga o ngāi Māori e mōhio nō hea

ake rātou, ko wai ō rātou whanaunga, ko wai te hapū, ko wai te iwi. Kei ngā tatauranga taupori o nāianei, e kitea ana taua hunga e mōhio ana he Māori rātou engari kāre i te mōhio nō hea ake rātou. Arā te kōrero o runga nei e mea ana, ki te takahi haere koe i roto, i runga rānei i te moana, e kore e kitea e koe he wāhi hei tūnga, he papa rānei e taea e koe te tū. Nā reira e puta ana tēnei mō te hunga, te hapū, te iwi rānei kua whenua kore.

Maramataka 2006 –2007

- Hakihea
- ▼ Mo te marama katoa
School Trustee Elections
Ā-motu
robsong@xtra.co.nz
- ▼ Mo te marama katoa
Mō Tātou - Te
whakaaturanga o Ngāi Tahu
Whānui
Te Papa Tongarewa
Te Whanganui-a-Tara
- Kohi-tātea 2007
- ▼ Mo te marama katoa
School Trustee Elections
Ā-motu
robsong@xtra.co.nz
- ▼ Mo te marama katoa
Te Whakaaturanga o Vaka
Moana
Te Whare Taonga o Tāmaki
Makaurau
09 309 0443
news@aucklandmuseum.com
- ▼ Mo te marama katoa
Te Whakaaturanga o Vaka
Moana
Te Whare Taonga o Tāmaki
Makaurau
09 309 0443
news@aucklandmuseum.com
- ▼ Mo te marama katoa
Mō Tātou - Te
whakaaturanga o Ngāi Tahu
Whānui
Te Papa Tongarewa
Te Whanganui-a-Tara
- ▼ 5 - 7
Te Hui Rangimarie i Parihaka
Parihaka
Taranaki
admin@parihaka.com
- Hui-tanguru
- ▼ Mo te marama katoa
School Trustee Elections
Ā-motu
robsong@xtra.co.nz
- ▼ Mo te marama katoa
Te Whakaaturanga o Vaka
Moana
Te Whare Taonga o Tāmaki
Makaurau
09 309 0443
news@aucklandmuseum.com
- ▼ 3
Te Hui a ngā Māori
Kawhia
Waikato
Jo Hamblyn
jo@otorohanga.co.nz
07 873 6132
www.kawhiaharbour.co.nz
- ▼ 3 - 6
Kaha Mai Tuwharetoa - Ngā
kēmu a te Māori me ngā
Moutere o Te Moana nui ā Kiwa
Turangi
Gloria Reihana
info@hekainga.com
07 386 7097
Waea whakaahua: 07 386 6037
- ▼ 21
Te Rā Whakanui i ngā Reo
Ūkaipō o te Ao
Ngā whenua katoa nō ngā
tōpito o te Ao
Susan Isaacs
04 473 5536
- ▼ 22 - 25
Te Matatini - Te Ahurei o ngā
mahi Kapa Haka o te motu
Deanne Thomas
06 357 4044
027 244 7237
Leanne Armstrong
06 759 6947